

Thaler / Auch Schwarzburgische vnd Mansfeldische  
Spisgröschlein / desgleichen Marien vnd andere geringe  
Groschen / zwischen derselben zeit vnd schierstkommenden  
Leipzigischen Ostermarkt zuuerschieben vnd los zuwerden /  
Als wollen wir vns gnediglich vorsehen / jr werdet solchem  
wirkliche volge gethan / vnd dahin getrachtet haben / wie jr  
der erwehnten bösen geringen Münze los geworden seid /  
vnd also fort an solcher geringen verbotenen Münz hal-  
ben / vnserm jüngsten Mandat vnwegerlich vnd gehor-  
samlich nachsetzen / Welches Verbot wir dann hirmit wi-  
derholet vnd vernewert haben wollen.

Als wir dann auch in solchem vnserm Mandat vnd  
Ausschreiben / erwehnung gethan / denen Münzsachen fer-  
ner nachzuforschen / vnd durch ein beständige Valuation /  
desto mehr in endtliche gewisheit zubringen / So seind wir  
auch solches also ins werck zurichten vnd zuuolnziehen  
genzliches fürhabens vnd entschlossen gewesen / Diueil  
aber gleich mit eingefallen / das auff diesem zu Speyer ge-  
haltenem Reichstage / von der Münz nicht allein ein stad-  
licher Tractat gehalten / Sondern auch die hiebevorn öffent-  
lich im Reich verkündte Münz Edict vnd Abschied wider-  
umb vernewert / darob zuhalten / mit allem ernste geboten /  
Vnd dannach Krays vnd Valuation tage zuhalten / allen  
Ausschreibenden Krays Fürsten auferlegt worden / Wir  
auch darzu allbereit in diesem OberSächsischen Kreisse  
einen Kreistag gegen Gütterbock ausgeschrieben / vnd ent-  
schlossen sein / vns daselbst eines Valuation tags / mit den  
Stenden dieses Kreisses zuvergleich / Auch vber dis alles  
ein gemeiner Deputation Tag / dorauff dan vnter anderm  
von der Münze ferner gehandelt vnd tractiret werden  
soll /